

小

腆

紀

傳

小腆紀傳卷第五十

前翰林院檢討加詹事府贊善銜六合徐肅撰

列傳第四十三

忠義二

夏萬亨

王養正

王域 史夏隆

劉允浩 胡纘

李時興 高飛聲

梁于涖

李翺

周定仍 補

涂伯昌 子先春

霍子衡 子應蘭 應荃

廖翰標 梁萬爵

巫如衡 子學展

陳象明

蕭孟 憲泰

周震 李興璋 邱式耕 補

唐誼 補

田闕 補

鄭雲錦 王道光

夏萬亨字元禮崑山人萬厯戊午舉於鄉由婺源教諭遷西華知縣時河南寇盜充斥萬亨修備甚嚴居三載量移夏邑地小不足以用武賊有鈔掠城下者單騎開門諭之或不聽命則曰甯殺我毋殺我百姓賊乃相驚異稱爲好官不殺一人而去永城劉超叛督師丁啓睿率軍討之屯聚者且數萬軍需器械不缺於供萬亨力也宏光時奉命迎太后擢江西布政使言者以爲驟改僉事分巡南昌瑞州初至給兵餉贏十之一詰之吏吏曰故事爲公所得正色曰侵奪軍資豈我所爲况今何時乎有保甯王者避寇南昌其舍人恣橫無狀執而笞之一府洶洶露刃作難民憤怒將焚王府萬亨撫定

之尋遷按察使署布政司事南京潰奉母至撫州屬於門生
時南昌已爲降將金聲桓所據列郡望風潰萬亨乃入建昌
奉益王於建昌城破被執聲桓以其能得民將藉以撫徇諸
郡曰公從我當大任萬亨書絕命詞見志聲桓不欲有害賢
名械送武昌與王養正等同斬於市妻顧子婦陸孫一女孫
一皆先赴井死婢僕同死者三十餘人我

朝賜通諡曰烈愍

王養正字聖功一字蒙脩泗州人崇禎戊辰進士授海鹽知
縣以憂歸服闋補秀水計典改河南按察司照磨歷遷襄陽
推官刑部主事員外郎南康知府平盜有功南都立進副使
分巡建昌會布政使夏萬亨至養正乃與知府王域推官劉

允浩南昌推官史夏隆建昌通判胡縝共起兵拒守城破被執死於武昌妻張氏聞之絕粒九日而死我

朝賜通諡曰烈愍

王域字元壽華亭舉人除宿州學正流賊至佐有司捍禦有功歷工部主事榷稅蕪湖時上游道梗商少而稅額增域疏請仍舊從之都城陷諸榷稅者多入己乃歎曰君父遭非常禍臣子顧因以爲利邪悉歸諸南京戶部宏光時擢本部郎中出爲建昌知府以清正稱南昌破官民拒守城曰事急矣國無主不可以集眾乃與副使王養正等奉益王爲號分守南門城陷被執亦死於武昌我

朝賜通諡曰烈愍

劉允浩字集生掖縣人崇禎癸未進士家居聞北京之變欲南下說劉澤清舉兵適賊至萊州卽領鄉勇擊走之奉母南下時寇盜接踵聞允浩名不敢害抵淮與黃得功相結慨然有報國之志史可法壯之將留以參軍事允浩不可謁選南都授建昌推官助城守督戰甚力殺傷過當城陷猶率眾巷戰中矢被執死之史夏隆宜與人與允浩同年進士官南昌推官胡縝桐城人官建昌通判同被執與夏萬亨等械至武昌同斬於市傳首江西棄屍城下建昌士民哀其忠哀而瘞之沌岩河側表曰六君子之墓我

朝賜允浩夏隆縝通諡俱烈愍

李時興福清舉人由知縣歷官袁州同知攝府事乙酉

王師已下南昌時興與士民悉力拒守無何守將蒲纓戰潰湖廣援兵黃朝宣等五營亦譟歸時興知不可爲自縊於萍鄉官舍一僕亦從死我

朝賜通諡曰節愍

高飛聲字克正長樂舉人初知玉山縣遷同知乞養去隆武時大學士黃道周以督師募兵邀與之偕令攝撫州事

王師逼度力不支乃遣家人懷印走閩而身以守城死隆武帝聞之嗟悼贈按察司僉事我

朝賜通諡曰節愍

梁于浹字飲先江都人崇禎癸未進士知萬安縣乙酉秋王師至嬰城固守援絕被執金聲桓欲降之不可繫南昌獄

挈妻匿山中復返則城已戒嚴僕呼曰敵且至速走先春曰
吾大人在吾舍是何之僕曰主往廣昌矣先春弗答奮袖入
遂及於難我

朝賜伯昌迪謚節愍

霍子衡字覺商南海人萬厯中舉於鄉由教諭累遷袁州知
府解職歸唐王聿錞稱制召爲太僕寺卿廣州破語妾莫氏
及三子應蘭應荃應芷曰禮臨難毋苟免若輩知之乎三子
皆曰惟大人命子衡援筆大書忠孝節烈之家六字懸諸中
堂易朝服北向再拜又易緋袍謁家廟先赴井妾從之應蘭
偕妻梁氏及一女繼之應荃應芷偕其妻徐氏區氏又繼之
惟三孫得存有小婢見之亦從井死我

朝賜子衡通謚烈愍

廖翰標龍門人天啓中舉人官江西新城知縣廉惠民爲建祠丙戌龍門破以二子託從父某從容自縊死梁萬爵番禺人隆武丙戌舉於鄉肆鑄立授行人是年城陷慨然曰此志士殉節之秋也赴水死我

朝賜翰標萬爵通謚節愍

巫如衡字宗岷甯化人以諸生遊太學隆武時補南海丞廣州市賈侵官濠以益私屢遇霖潦官衙如涉當道檄如衡查毀之眾賈輸千金乞仍舊如衡拒之賈急則賄當道寢其事廣人笑如衡愚學使林佳鼎獨重其節操薦於總督丁魁楚委署海豐化州民皆愛之丙戌十一月

王師入廣州逼肇慶如衡扈永厯帝奔梧命署蒼梧知縣丁亥正月

王師入梧州巡撫曹燧降僚屬皆稽首上印綬如衡獨持印不與曰天子以此屬我胡可委之人再三論不屈乃遇害我朝賜通謚曰節愍子學展尙幼聞凶耗則惘惘如有所失既長徒步詣粵求父骸以滴血法試之最後一骸血蝕沒再試再驗號哭褻負而返題所居曰存莪意

陳象明字麗南東莞人崇禎戊辰進士授戶部主事權稅淮安以清操聞厯遷饒州知府忤巡按被劾謫兩浙運副累遷湖南道副使隆武時奉何騰蛟令徵餉廣西未復命永厯帝立粵東盡失象明檄調土兵與陳邦傳連營東至梧州榕樹

潭遇

王師戰敗死之我

朝賜通諡曰烈愍

蕭愍武昌人以諸生爲劉承胤坐營參將何騰蛟題爲總兵官管黎平參將事丁亥八月承胤旣歸命令降將陳友龍招之不從已而城破愍以短兵相接力竭自剄死友龍遂盡劫騰蛟眷屬以去我

朝賜通諡曰烈愍

周震官中書舍人居全州嘗佐何騰蛟軍武岡失全州危甚震集文武將吏盟於神誓以死拒條上城守事宜永曆帝擢御史充監軍無何郝永忠等盡撤兵還城虛不能守諸將議

舉城降震力爭不可眾怒曳出斬之同難者守備孟泰本州人以仰藥死妻子俱自殺時戊子二月也我

朝賜震通諡忠節泰烈愍

李興瑋巴陵人以教諭署臨武知縣丁亥夏

王師破岳州偕父赴省請援母止之勿聽既全家遇害興瑋乃隨巡撫章曠起兵衡陽圖恢復不克死我

朝賜通諡曰節愍

邱式耜字祈年沅州諸生嘗倡義團練禦賊有功永歷時徒步詣行在上書授翰林院待詔持節招勦鎮會閣部李若符駐黔陽褒衣大帶見我總鎮徐勇於辰州被執送武昌丁亥十月黔陽破若符死

世祖章皇帝命宥式耔而式耔志必死爲文自祭有以汨羅之水首陽之薇致祭於邱君之神云云因被殺

命下已無及矣若符事未詳

補

唐誼字正之武陵人父紹堯忤魏忠賢下獄誼年十四負鑽請代人稱其孝考授推官隨父任汝南陝西剿寇有功父臨終命誼及其弟誠毀家勤王誠字存之崇禎癸未進士官少詹事助瞿式耜守桂林進文淵閣大學士督五省義師與何騰蛟相犄角湘潭破奔肇慶誼留楚奉母保永州龍虎關與粵中相應庚寅三月我鎮帥馬蛟麟襲之全家被執稱誼作書招誠誼大罵見殺蛟麟乃執其母入粵誠號泣上印綬自囚贖母蛟麟禮而釋之或薦之於

朝誠作詩謝之曰無如世相韓此義不忍絕遂隱秦人山以
終次弟訪字周之以桂林籍中崇禎壬午鄉試第一式耜薦
授翰林院庶吉士掌制誥亦奉命入楚聯絡各鎮知不可爲
乃痛哭祝髮稱食苦和尙補

田闢河南人崇禎甲戌進士宏光時以戶部權稅虔州隆武
二年二月募兵入衛改都察院僉都御史疏糾閣臣曾櫻語
連中宮上含怒未發也五月遣錦衣衛王之臣往閱其師之
臣迎合意旨疏糾詭兵冒餉逮下詔獄然兵籍皆實餉亦自
備官所給尙未發也衛臣王承恩婉轉辨白班行亦多申救
上怒不解旋以皇子生得釋闖敗乃擁眾山谷崎嶇楚粵間
戊子九月兵敗抗節死補

鄭雲錦字子素莆田人以明經起家知靈山台浦縣事粵東
陷後漳平伯周金湯委署廣西左州知州丁酉十二月李定
國再復南甯廣國公賀九儀檄雲錦署橫州知州戊戌正月
十五日城再陷被執送潯陽作馬上吟曰昨朝刺史出見客
騎馬城上點軍冊今夜穹廬作楚囚不信雄心旋落魄熹微
帳外獨徘徊依依斜傍霜華白笳吹倏動動人愁聲聲催促
營炊迫猶拏扶我上馬行簇簇護持無閒隙天地寬大難可
量此時伸展不盈尺濃嵐橫抹斷城腰慘淡烟雲天蹙額北
風拂面任欺凌古樹棲禽驚振翮孤臣馬上嘯一聲曉山失
曉顏如墨回首羊腸路渺漫我軍創病何狼籍猶喜人人不
攢眉各向虜兒雄咤叱朝廷豢養三百年雖敗志氣不蕭索

河水縈環馬足遲羨煞一派寒光碧鳥聲上下叫黃昏斜陽
落浦荒邨僻此宵夢醒何處也瀟瀟風雨穿古驛遂檻車置
肇慶獄論降不可絕食七日不死乃復食作從西山義士遊
詩云虎豹山之獸猶思文其身皮骨蒸雲霧耐饑過七晨鬚
眉丈夫子忠孝以成名時數值陽九血軀何用生君不見蘇
武海上十九年沙漠齧雪與吞羶又不見常山舌罵賊聲不
絕又不見文山三載坐小樓正氣衝寒低斗牛古人已往名
存耳時地各殊肝膽似逍遙躡步首陽山義士一去不復還
惟有青青薇蕨隨風長歲久無人采自蕃我踞山巔拜孤竹
不茹烟火洗心腹一日二日不食粟慷慨能歌西山曲三日
四日不食粟斥罵獄吏無休息五日六日果何如曉來曾把

髮鬢梳整冠理衣行鬢鑠作詩遂向壁間書七日八日枯胃
腸忠魂直至白雲鄉帝廷從陟降渣滓委道傍任教飢肉啄
鷲烏到底何曾失故吾人生自古誰無死覓得死所幾人乎
在獄三年吏民勸其雉髮雲錦曰吾辦死久矣所未卽死者
留一日鬢髮卽頂一日君恩爲一日南冠之楚囚卽爲一日
大明之臣子耳就刑之日飲酒談笑如平時觀者莫不悚歎
焉獄中著有廣恨賦獄賦縲紲者說題獄詩像并贊雜吟雜
論共一卷付其戚友宋祖誥祖誥字爾錫亦事永厯署思恩

同知

王道光江西舉人永厯時由雲南太和知縣厯擢廉州道癸

巳二月

王師至被執不屈死補

男承禮編輯

仁和魏錫曾參校
會稽梁繼兀覆校

小腆紀傳卷第五十終

小腆紀傳卷第五十一

前翰林院檢討加詹事府贊善銜六合徐肅撰

列傳第四十四

忠義三

吳錫玉

黃克善
項人龍

邱嵩

成

啓

彭永春
董四明

徐可行
孫大華

徐永泰

王喬棟

周二南

俞一鱗
陽鎮

吳愉
龍孔蒸

周侯
洪業嘉

張繼孟

陳其赤
鄭安民

張孔教
方堯相

劉士斗

沈雲祚
趙嘉煒等

王勵精

賀允選
顧繩詒

胡

恆

徐孔徒
蘇瓊

朱蘊羅

陳君寵
姚思孝

單之寶
鄭夢眉

朱儀

秦民湯
黃儒

艾吾鼎

尹仲

寶可進
王源等

王起峩

楊國柱

卜大經等
吳獻棊

高宗

董克治 蔣世鉉 梁士驥

雷應奇 通江童子 李含乙 李先完 樊明善 陳懷西 馬孫鸞

熊兆柱 王光先 王爾讀 黎應大 葉大賓

魚嘉鵬等 李師武 劉道貞 子睽度 陳登皞

高成功 補 王承憲 弟承瑛 高其勳

王士傑 段見錦等 張耀 吳子騏等

曾益 弟顧人龍 曾異撰 程玉成

羅國燾 焦潤生 夏衍虞 龔茂勳 何思

徐道興 陳六奇等 席上珍 金世鼎 何思

黃應運 楊于陸 王運開 弟運閔 子之謙

吳錫玉歛人官南康通判甲申秋柯賊掠南康錫玉手鐵鞭
率壯丁數百人禦之賊隔水據岡為陣錫玉發一矢中賊渠

賊拔嗅之曰未傅毒下岡返攻錫玉躍馬獨出鞭殺數賊已
賊大至遂遇害贈按察司僉事我

朝賜通諡曰烈愍

黃克善合肥人官東湖守備甲申秋闈寇閩羅宋三劫龜茲
官兵合剿克善斬獲獨多馬蹶被執將死捋其鬚曰勿令血
染我鬚也賊壯之我

朝賜通諡曰烈愍又四方死寇難者邱嵩甯化武進士官泉
州守備解組歸值田仰潰兵至鄉人誤以爲寇強擣爲帥禦
之兵未交而眾潰雋與戚人吳維城同遇害我

朝賜嵩通諡烈愍項人龍連城人以太學生授潮州推官未
赴而國變遂隱不仕戊子楊齊雲掠河源里人龍父時選禦

寇陷於池人龍赴水救之並遇害

成啓應天人以貢生官湖口縣主簿乙酉春左良玉兵東下啓公服端坐於庭叱之曰國家養汝將以靖亂反爲亂邪兵索金復叱曰吾寒官也何金可索遂被殺

彭永春武陵人官九江衛經歷乙酉四月四日左兵突入城永春曰我官雖卑然食朝廷祿不可不死命僕舉火焚其廡大書於壁曰九江衛經歷彭永春死節處具衣冠率子女六人赴火死

徐可行九江衛指揮僉事城陷聞都司董四明於城樓自刎其妻史妾姚偕二子俱投水死可行大呼曰我武臣亦有人哉入告其母汪氏母曰我家何不若彼也卽投於井妻鄒子

婦陳繼之可行於屏間大書曰世受國恩闔門殉節投筆北向拜自縊於望京門之城樓我

朝賜可行通諡節愍四明烈愍

孫大華者德化民也左兵肆掠大華憤殺一兵其眾露刃而謀總督袁繼咸不得已命究殺兵者市人大譁大華慨然曰殺身以安眾我何惜一死挺身出曰殺兵者我也與眾何與斬以徇一城得解

徐永泰南安人以武舉累官守備崇禎壬午邑有山寇斗栲之變永泰選驍卒自隨單騎直入擒其魁餘黨悉解南都立官鎮江參將擊高傑叛卒於江力戰死

王喬棟雄縣人舉進士官朝邑知縣縣人王之宗爲闖黨所

惡坐以賊下喬棟嚴徵喬棟不忍封印於庫去巡撫將劾之士民擁署號呼乃止崇禎時累遷湖廣參政時楚地大亂監司多不至喬棟兼緝數篆乙酉夏闖賊棄秦入楚據武昌喬棟時駐興國州城陷自經城樓上我

朝賜通諡曰節愍

周二南字汝爲蒙化人由選貢爲長沙通判擢岳州知府士民固留乃以新秩還長沙乙酉九月闖賊餘黨劉體仁郝永忠將求撫於何騰蛟率眾四五萬突入湘陰距長沙才百里城中人不知其求撫也大恐二南率千人往偵之抵瀏陽賊以爲襲已叢射之二南與參謀吳愉吉府指揮千戶俞一鱗俱力戰死一鱗善化人我

朝賜二南通諡節愍

吳愉字去佛善化貢生嶺山先生道行之子也與弟愷俱以文行顯闖賊餘黨犯瀏陽長沙知府周二南奉檄往愉以參謀從行戰於官渡被繫不屈死子甯訥痛父死徒步號泣烈日中覓遺骸歸哀毀不食卒人稱吳孝子

周侯湘潭人以貴家子折節讀書矜尚名義用薦授攸縣教諭遷推官未赴己丑湖南羣盜降而復掠侯殉城死

陽鎮湘鄉人崇禎壬午舉人雄於文子淑亦能詩戊子春金王之亂父子俱殉焉或曰鎮官太僕

龍孔蒸湘鄉人明末與弟孔然先後舉於鄉獻賊偽檄下孔蒸攜瓢酒登絕壁悲嘯竟日丁亥潰兵掠湘鄉以衛母遇害

孔然閉門授徒洪承疇欲延之幕府不就以壽終又有洪業嘉者亦湘鄉名宿死於潰兵

張繼孟字伯功扶風人萬曆末年進士天啓二年由知縣擢南京御史未出都奏籌邊六事末言已被抑南臺由錢神世界公道無權詔令指實以風聞對被詰責左都御史趙南星請因繼孟言思偏重之弊敕吏部挽回於是忌者目繼孟爲東林尋以不建魏閣祠削奪歸崇禎二年起故官疏指吏部尙書王永光人言踵至一疏之謬又劾南兵部尙書胡應台貪污永光深嫉之出爲廣西知府土酋普名聲久亂未靖繼孟設計馘之一方遂安遷浙江鹽運使忤視鹽中官崔璘左遷保甯知府進副使分巡川西甲申八月獻賊犯成都佐巡

撫龍文光設守城陷被執不屈死妻賈氏殉之我

朝賜通諡曰忠節

陳其赤字石文崇仁人崇禎戊辰進士以吏能擢兵備副使
轄成都投百花潭死我

朝賜通諡曰節愍

張孔教字魯生會稽舉人官按察僉事不屈死子以衡秘不
令母孔氏知奉以南竄踰年知之罵曰汝父死二年我尙偷
生使我無顏見汝父地下自刎死我

朝賜孔教通諡烈愍

鄭安民浙江貢生歷蜀府左長史分守南城城陷不屈死我

朝賜通諡曰節愍

方堯相黃岡人官成都府同知與劉之勃請餉於蜀王不應則投王府河左右拯之起城陷遇害於萬里橋我

朝賜通諡曰節愍

劉士斗字瞻甫南海人崇禎辛未進士知太倉州有聲州人張溥張采與蘇州推官周之夔以事相爭士斗右二張之夔許之總督之夔罷而士斗亦中計典謫江西按察司知事擢成都推官十六年巡按御史劉之勃薦爲建昌兵備僉事明年八月賊逼之勃促之行士斗曰安危死生同此耳城陷被執時之勃與賊語士斗呼曰此賊也公不可屈獻賊命梓以上反顧語如前遂闔門被殺我

朝賜通諡曰烈愍

沈雲祚字子凌太倉人崇禎庚辰進士知華陽縣賊破夔州
謁蜀王陳守禦策不見用城陷與劉之勃劉士斗俱幽於大
慈寺絕粒半月不死賊餽之食躍起大罵曰我欲食賊肉豈
食賊粟邪遂同遇害友人某匿其幼子苟蔚山中越二十年
始歸我

朝賜通諡曰忠烈

趙嘉燁山陰人官郟縣主簿奉巡撫龍文光令決灌縣堰水
以繞城壕遇賊射之投水死子慶騏自浙走萬里求父屍不
得遇堰夫告以死處爲三渡口招魂葬焉又成都教授何某
夫婦益明倫堂上籍貫名字不可詳而成都知縣吳繼善者
太倉州人嘗上書蜀王請發藏金備守禦城破後或曰一家

三十六人同遇害族人吳偉業傳其事甚確而顧炎武則謂
繼善已遁去其同年某在賊營招致之授偽官後爲賊草祭
天文紙兩幅相接賊大怒曰渠不欲我天下一統邪夫婦受
極刑毛奇齡爲趙嘉煒作墓志亦言繼善降賊云武臣之最
著者劉佳允川北進士借文光赴浣花池死同死者總兵張
奏功世襲指揮馬震張卜昌羅大爵劉鎮藩阮士奇參將徐
明蛟都司僉書李之珍或陷陣死或巷戰死紳士死難者給
事中吳宇英工部主事蔡如蕙聞蜀藩殉難死者順天府治
中莊祖詔同弟致仕按察司祖誥罵賊死大理寺正王秉乾
驅閩家投井死宣化府同知王履亨被執投江死東流知縣
乾曰貞以磚斃一賊死彭澤知縣張於廉與妻鍾氏同罵賊

死父子同死者二人明經趙鴻偉及子進士昱明經邱之坊
及子庠生祖福皆以不應賊召死安縣監生李資生宣大總
督鑑之子也與妻董氏並自縊死又有聞蜀藩殉難死者則
邠縣舉人江騰龍不應賊召死者則諸生劉繼皋費經世劉
宏芳皆姓名可攷者也我

朝賜佳允奏功明蛟祖誥秉乾通謚均烈愍宇英忠節大爵
鎮藩士奇之珍如蕙祖詔履亨曰貞於廉節愍

王勵精蒲城人崇禎中山貢生授廣西通判遷崇慶知州多
善政甲申八月成都陷州人聞風避其僕勸之去勵精不可
具朝服北面拜復西向如禮從容於甬壁書孔曰成仁數語
登樓以利刃縛柱貯火藥樓下候報賊騎渡江縱火焚樓觸

刃貫胸死賊壯其節葬之所書字風雨不滅後二十餘年州人建祠祀之祀畢壁卽頽遠近歎異我

朝賜通諡曰烈愍

賀允選丹陽舉人官資陽知縣甲申城陷被執不屈賊處之別營至乙酉冬被殺十七日俱死我

朝賜通諡曰忠烈

顧繩詒不詳何處人官仁壽知縣先是知縣劉三策以城陷死贈尙寶司丞越五年再陷繩詒死之而全省破壞寢郵不可得我

朝賜通諡曰節愍

胡恆竟陵人官川南道駐節邛州甲申十月獻賊至恆命幕

客汪光翰出調兵來援未至而城陷恆與其子之驍戰死妻
樊氏妾成氏馮氏之驍妾周氏僕京兒弩來婢女二人俱從
死惟之驍妻朱氏及幼子峩生得脫徐孔徒江西人官邛州
知州賊欲生降之不屈怒其不順孔徒曰不屈固不順降則
不忠遂死之我

朝賜恆通諡烈愍孔徒節愍

朱蘊羅江夏舉人知蒲江縣城陷巷戰被執全家俱死蘇瓊
石埭人崇禎甲戌進士知瀘州死於寇又有王萬春者瀘州
衛指揮也兵敗被執不屈全家死之我

朝賜蘊羅萬春通諡烈愍瓊忠烈

陳君寵字簡之新化人萬曆戊午舉鄉試第一官羅川知縣

擢知潼川州賊將馬科陷潼川說之降不屈幽之五顯祠從容賦絕命詩自經死又單之賓官中江教諭姚思孝官內江教諭鄭夢眉官南部知縣皆以城陷不屈死我

朝賜君寵夢眉通諡節愍之寶烈愍

朱儀字象先涇縣人崇禎庚辰特用榜進士官嘉定知州獻賊入蜀士民洶洶或勸之去儀不可賊大至蟻附攻城儀束蒿灌脂焚而投之城陷而完者再賊怒攻益急城中矢竭糧盡謂其子命錫曰大義無過君親不可爲不義屈妻胡氏奮然曰臣死君忠也子死父孝也妾獨不能爲夫死節乎以金簪刺喉死儀朝服北向拜命家人舉火與子命錫及妻胡氏之骸同燼儀善屬文工書湖北黃鶴樓有飛鳴過我四字石

刻今尙存時先後殉難可紀者榮縣陷知縣秦民湯被執不屈叢射死興文陷知縣艾吾鼎死之民湯吾鼎俱漢陽人吾鼎儀同榜進士也又榮經知縣黃儒福建舉人庚寅賊帥劉文秀來攻城陷巷戰被獲磔死我

朝賜民湯吾鼎通諡烈愍儒節愍

尹伸字子求宜賓人萬曆戊戌進士工詩善書由推官累遷兵部郎中西安知府陝西提學副使蘇松兵備副使投劾去天啓中起分守貴州威清道贊巡撫王三善軍三善沒坐奪官尋以普安三岳河之捷免罪貶一秩視事崇禎五年以河南右布政使罷歸伸強直不阿所至與長吏忤然待人有始終篤分義甲申獻賊陷敍州避之山中被獲大罵求死賊重

其名欲生致之昇至井研罵益厲賊不堪乃殺之南都起太常卿伸已先死我

朝賜通諡曰忠節

竇可進安岳人崇禎庚辰進士官雲南兵備副使告歸甲申城陷罵賊賊剝其皮磔之王起義可進同榜進士也倡義得萬餘人戰敗歿於陣我

朝賜可進起義通諡烈愍時蜀中士民殉難者則新津拔貢

王源長賊所執與妻徐氏並不屈死彭縣諸生祝不傳賊至

負母逃賊欲殺其母求以身代不許遂大罵同死劉昌祚亦諸生被執不屈死魯城墮者失其名被執至成都大罵割其舌嚙血復罵寸磔死業醫徐履端者赴水死仁壽貢生顧鼎

鉉諸生陳素陳應新左灼拒賊死灼妻閔氏殉之汶川貢生
高仲選偕子女投江死龍安諸生梁道濟城陷偕妻楊氏避
亂山中遇賊皆不屈死潼川舉人李永葵稱病臥牀昇至成
都張目不言遂遇害廩生李錦中以僞官考試閉戶自經死
遂甯諸生羅璋奉母避山中賊圍之格鬪殺數人母得脫而
璋遇害東鄉貢生冉璘挈家避天台寨賊追及偕其子宗孔
不屈死母楊氏妻向氏闔室自焚廣元諸生李猶龍抗節死
又郭大年嘉定州諸生也爲賊所戕妻楊氏自城上躍入江
中死周正健爲舉人賊將任元祐強之官不從被殺其子成
儒與少弟奔賊營抱父屍大哭並見殺珙縣舉人向科前江
陵知縣也城陷闔家死慶符陷民人張祖周投纆死又瀘州

陷州人韓洪鼎者原任澤州知州也韓大賓者原任推官也俱不屈死方旭及方伯元曾薦祚鍾子英皆諸生也賊掠生員至營中有泣訴求脫者旭叱之曰丈夫死即死耳乞憐何爲賊支解之伯元亦罵賊被殺薦祚投水死子英與妻同投江死我

朝賜向科通謚烈愍洪鼎大賓節愍

楊國柱絲竹貢生可賢子也崇禎庚辰獻賊犯絲竹獲可賢挾之曰汝子國柱守城召之降則免可賢佯諾臨城語其子曰賊不滿千汝第堅守勿以我爲念賊殺之甲申賊復至城陷國柱率士民數萬巷戰死典史卜大經鄉官戶部郎中刁化神皆死之諸生陶脩吉偕妻龐氏被縛中途投崖死民人

黃守學以孝聞母柳氏自縊死守學斂畢亦縊死我

朝賜化神通諡節愍

高宗舟梁山副榜甲申正月獻賊至宗舟率鄉勇守北門城
陷令妻孥自盡作書付僕達父所而身率家奴二十餘人巷
戰重傷死

吳獻棐萬縣貢生獻賊自夔州至值江水漲留屯者三閱月
民皆逃賊給曰降者不殺旣出悉驅之入水執獻棐強以爲
僞參軍不受斷臂解腕而死其子之英痛父亦被磔焉

董克治台州諸生獻賊陷重慶分兵來攻克治傾貲募勇壯
與賊戰長安坪不勝退據洞中賊誘以爵位不動相守月餘
賊鑿山梯洞薰之凡三千人感克治風義至死無二心者時

比之田橫云

蔣世鉉永川人獻賊犯永川世鉉集義勇二百人攔城固守戰於東門被執勸之降瞠目大呼曰速殺我不降也賊寸磔之賊又欲授舉人梁士騏官士騏怒罵被殺雷應奇并研人素負俠氣賊至曰奈何郡縣無一殺賊者糾義勇拒戰於高境關追至桑園力殺數賊死

通江童子姓名不可詳獻賊入蜀知縣李存性守禦甚嚴賊不能近乃僞爲官兵將襲城道遇童子給之曰勿言我兵也童子佯諾之及城門乃大呼曰賊至矣遂被殺存性爲文祭之

李含乙渠縣人由進士任禮部郎中甲申獻賊躡蜀含乙時

丁憂里居募軍士得數千人圍廣安城賊將馬元利來爭力戰被執邑人王樹極從含乙爲裨將已潰圍出見含乙被獲反戈殺數人被執同不屈死又有李完者西充人以進士官御史致仕歸賊入城亦不屈死我

朝賜含乙通諡忠烈完節愍

樊明善南充諸生也初聞北都陷喪服見巡撫龍文光於順慶曰鼎湖新逝臣子不共戴天公開變三日矣而無所施爲邪文光深謝之後破家禦賊死陳懷西邑武生也賊誘之官懷西曰甯作明朝武生不爲逆賊元老賊斬之懸首東門其子某哀痛死又有諸生馬孫鸞者見賊殺懷西大罵割舌死王光先營山諸生也賊犯營山光先率義勇戰於北關被執

不屈死王蘋者大竹武生也聞賊入川語父某曰食國家水土力不能報畢命可耳賊至其父拔刀相迎殺數賊力竭死遂擒蘋罵不絕口死又王爾讀者儀隴王臬家僕也賊追縣令李時開將及之爾讀奮身禦賊令奔脫爾讀被殺黎應大夾江貢生潛結鄉鄰之倡義者圖恢復事露賊支解之子照斗照達照鸞同日遇害

熊兆柱李師武魚嘉鵬皆敘州諸生也倡義討賊兆柱被獲罵曰天運至此任爾戕戮賊剝其皮鞭鼓懸之城門嘉鵬既殺偽官被縛拷訊其黨厲聲曰自我爲之恨不擒斬獻逆耳他人何與與師武同磔死舉人周元孝及諸生劉苞晏正寅王應世郭大勳李合宗梁爲憲余智俱抗節死又周壩操舟

人某賊命之渡不應問船所在亦不應脅以刃忿怒拳擊賊賊殺之

劉道貞字墨仙邛州人天啓辛酉舉人獻賊陷邛道貞走沈黎與黎州指揮使曹勛合謀起兵拒戰於雅州小關山大破賊眾斬千餘級賊不敢南而還據邛道貞命子睽度以兵來爭賊搜城中得道貞妻王氏環刀械頸令招其子大罵不從支解之舉家皆死睽度亦戰歿

補

葉大賓縣州諸生也獻賊入蜀脅大賓牧邛州大賓佯受之而密與紳民謀舉事給賊將曰蒲江要害聞有警宜調兵往賊信之分千餘人往又曰大邑隸邛將軍責也恐有變亦宜調兵往又分千餘人乃矯令殺賊帥保護州民萬餘奪西門

而去補

余飛洪雅人賊陷洪雅飛伏壯士數百人於花溪山谷而以羸弱誘之賊入隘中伏發不得出截殺幾二千人賊大沮喪沿江遁去庚寅賊復至飛單騎被圍力殺千數人以死補

陳登皞眉州人也綽號鐵腳板丙戌賊帥狄三品駐眉州忽下令驅城中人集道姑巷原田壩上至則以兵圍而殺之凡五千餘人登皞憤賊殘暴裂衣爲旗集四鄉遺民得數千人樹柵醴泉河賊來攻登皞率眾白梃耰鋤殺賊三百人賊懼間道移東館登皞復遣壯士持酒米雞豚迎於道賊納之營中夜半襲賊營壯士從中鼓噪出賊駭奔復斬數百級賊乃遠遁登皞自是以鐵勝名營倡義者悉歸之二年中無敢犯

境者後爲向成功所殺向成功者嘉定人也嘗起兵拒獻賊
庚寅

大兵將至成功以眾五千據石佛棧

王師破其柵成功中流矢卒

補

高明建昌衛人原任長沙知縣也庚寅劉文秀將至明集士
民拒於焦家屯兵敗自焚死我

朝賜通諡曰烈愍

補

王承憲世襲楚雄衛指揮舉武鄉試擢遊擊爲副使楊畏知
前鋒沙賊攻楚雄凡守禦事皆承憲綜理之已賊再至偕土
官那篤等出城衝擊賊披靡俄中流矢死弟承瑱亦戰歿我
朝賜承憲通諡烈愍

高其勳字懋功初襲馬龍所千戶後舉武鄉試爲黔國公標下中軍吾必奎之亂以功擢參將守武定及沙定洲再反分兵來攻固守月餘城陷衣冠服毒死陳禎者世爲大理衛指揮未嗣職城陷巷戰手馘數賊而死我

朝賜其勳通諡節愍禎烈愍

王士傑太和縣丞也太和爲大理附郭縣沙賊圍大理士傑佐上官竭力捍禦城陷死於城上同時死者大理府教授段見錦經歷楊明盛及其子一甲司獄魏崇治而故永昌府同治蕭時顯解任以道阻寓居大理亦自經士民同死者舉人則高拱極投池死楊士俊闔門自焚死諸生則尹夢旂夢符馮大成倡義助守罵賊死楊憲闔門自焚死楊恣旣死復甦

妻竟死人稱太和節義爲獨盛云我

朝賜時顯通諡節愍單國祚者會稽人通海典史也城陷握印坐堂上罵賊被殺印猶在握縣人葬之諸葛山下

張耀字融我三原人萬曆中舉於鄉由知縣歷官貴州布政使得民心獻賊死其黨孫可望等率眾由川入黔渡烏江逼貴州守將總兵官皮熊走都勻耀言於巡撫米壽圖請發民兵守禦壽圖以眾寡不敵難之俄賊掩至壽圖走沅州耀率家眾乘城拒擊城陷被執可望說之曰公秦人也若降當位宰輔耀怒罵不屈械其妻孥於前曰降則一家免死耀罵愈毒乃殺之一家皆慘死鄉官吳子騏字九遠亦萬曆中舉人授興甯知縣安邦彥之叛也圍貴陽子騏念母在倉皇棄官

歸遂不復仕崇禎十年蠻賊阿烏謎作亂總督朱變元屬子
騏走書召諸酋曉以利害相率降附變元上其功璽書嘉獎
是時聞可望將至偕邑紳劉瑄楊元瀛率鄉兵扼之要路敗
之賊來益眾力竭被執俱不屈死瑄字子佩官戶部主事元
瀛字蓬山官同知並鄉薦起家同時殉難者戶部郎中譚先
哲前甯前兵備參議石聲和俱平壩衛人或曰聲和死於安
順子吉諸生也殉之我

朝賜耀通諡忠烈子騏先哲烈愍瑄元瀛聲和節愍

曾益臨川人以貢生特用歷官司務主事遷兵備僉事貴陽
陷走定番州與按察使唐勳調土兵守城藥箭射賊將張能
奇幾死賊給之曰與我斗酒卽退兵去城中以爲怯也守稍

解賊乘之遂陷益闔門死難事聞贈太僕寺卿弟棻爲蒲圻令亦死於賊或曰益死於安平又有顧人龍者州人也致仕家居嘗助守破流賊冠帶登陴被執罵賊死我

朝賜益通諡節愍棻烈愍

曾異撰四川榮昌人舉於鄉知永甯州孫可望既陷貴州將長驅入雲南異撰與其客江津進士程玉成貢生龔茂勳謀曰州據盤江天險控扼滇黔棄之不守非人臣義也集眾登陴城陷異撰闔室自焚死玉成茂勳投火死我

朝賜異撰通諡烈愍

羅國瓚嘉定州人崇禎癸未進士官御史巡按雲南孫可望破曲靖國瓚方按部其地與知府焦澗生同被執至昆明國

小册續傳 卷五十一
十一
獻自焚死潤生與推官夏衍虞同不屈死潤生上元舉人修
撰竑之子也衍虞江津舉人我

朝賜國獻通諡忠烈潤生衍虞節愍又宗室壽欽見宗藩列
傳

陳六奇字鳴鸞龍江衛人萬厯戊午舉人初知景陵縣以廉
平稱移知南甯城破被殺於東門賊遂屠霑益連陷廣通在
籍前渾源州同知張朝綱死之妻馮氏同縊死子耀葬親訖
亦縊死我

朝賜六奇朝綱通諡節愍

席上珍姚安舉人金世鼎大姚舉人聞孫可望等入雲南乃
散家財募壯士二萬人與姚州知州何思率以乘城繕備未

周可望突遣其將張虎掩至一戰而敗世鼎自殺思及上珍同被執可望欲降之厲聲曰我大明忠臣豈屈於賊邪罵不絕刃其口罵益厲可望怒剝其皮思亦不屈死我

朝賜思通諡節愍

段伯美晉甯舉人余繼善耿希哲呈貢諸生聞李定國將至起兵拒守有昆陽孔師程者以從軍得官眾服其雄推以爲主及定國來攻師程汎舟先遁城破晉甯知州石阡冷陽春呈貢知縣嘉興夏祖訓與伯美等並死之同時殉難可紀者富民陷在籍知縣陳昌裔不受僞職爲賊杖死貢生李開芳與其友王朝賀自經死開芳妻及二子赴水死楚雄舉人杜天楨初佐楊畏知拒沙賊頗有功後畏知督兵擊可望敗績

天楨聞之卽自盡臨安陷進士廖履亨赴水死又江川知縣周柔強率兵拒李定國於撫仙湖敗績死之一軍盡歿我朝賜陽春通諡烈愍祖訓昌裔履亨節愍

徐道興睢州人以經歷署師宗州事曲靖被屠道興集士民諭之曰城守乎眾曰力薄兵寡何以禦之曰然若等何罪徒膏兵刃速去毋顧我我死分也士民請與偕厲聲曰失守疆土安所逃死眾洒淚去舍中止一僕出白金二錠授之曰此俸金也一以賜汝一買棺斂我僕哭請從死曰爾死誰收我骨舉酒自飲賊令出迎其首擲手中杯擊之曰吾朝廷命吏肯從賊求活邪遂被殺我

朝賜通諡曰烈愍先是武定陷同知楊于陸死之于陸劍州

舉人

王運開字子朗夾江人崇禎庚午舉人以推官署金騰道劉廷標字霞起上杭人以通判署永昌知府孫可望既受楊畏知之約乃移檄永昌迎沐天波歸省並索道府印運開廷標方守瀾滄江拒戰天波止之諭其以印往兩人曰印往則我亦降也賊言何可信哉乃遣家屬避騰越運開有弟運閔字子遠崇禎壬午舉人運開謂之曰弟未仕可無死可將吾妾俱西勿在此亂人意士民懼不降且屠詣運開廳事哭運開慰遣之則又詣廷標廷標曰賊伎倆吾素知之他城之降而屠者屢矣無益也眾哭益甚廷標取毒酒將飲眾始散是夕運開先自經廷標歎曰男子哉我老當先死王公乃先我邪

沐浴賦詩三章亦自縊可望賢兩人之死求其後或以運閔對召之行至潞江語僕曰此行將臣賊吾與兄豈異趣哉若收吾骨與吾兄合葬題曰夾江王氏兄弟之墓吾無恨矣躍入江死廷標子之謙永歷時以父死國難授趙州學正遷戶部主事

王師入滇被執主者索賂之謙曰父子二十年苦節愀滇南杯水耳安得賂復令薙髮曰禿頭鬼可見吾父乎遂磔烙死我

朝賜運開廷標之謙通諡俱節愍

黃應運字際飛福建歸化人邑令楊鼎甲奇其才拔爲童子試第一隆武二年鼎甲已易名鼎和官雲貴部院朝於福州

怪應運久滯經生題爲監紀推官攜之入滇委管貴陽府刑
務永歷改元思州苗叛鼎和謂應運曰不遇盤錯何知利刃
子努力爲之授應運思州推官兼監軍僉事甫抵任而平越
所屬黃平諸苗交叛應運由思州率兵抵黃平苗解圍去巡
按郭承汾題爲平越知府加參議銜旣而孫可望由黔入滇
復以應運攝威清道事以備之應運置家口於平越而輕騎
赴安順值川將王祥兵潰掠食遵義居民詣滇求救撫按議
遣官撫之莫如應運才可望聞應運遠出遣李定國襲安順
據之應運歸途聞報徑詣定國說之曰將軍有事於安順何
不尺一相報乃騷動貴部邪定國曰將出兵從此武夫本色
勿怪也應運曰恨安順陘陋耳若可屯駐車騎何不啓闢茨

子請此彈丸爲牧地天子方懸爵賞以網羅英雄未有不許
將軍者應運便當解職以鎖鑰相付矣定國色益和遽曰正
欲與貴道商之應運知其心動又難之曰宿聞將軍神勇敵
萬人又所部精銳一當百乃前此所據地旋得旋失何邪定
國曰兵家得失無恆不足論也應運曰不然當是名義不正
人人得睥睨之耳若藉三百年天子之名號加以將軍之神
威統率羆虎掃蕩不庭而聞風義從者又絡繹交助天下誰
敵將軍者他日分茅胙土傳之弈世中山開平不足比也今
將軍舍萬世不朽之功業而不王不霸傳舍州郡非良圖也
定國欣然曰貴道言是卽當與平東謀之應運曰平東在滇
遠未可期應運當捧盤敦與將軍定約耳定國許之乃歃血

誓扶明室無二心可望聞之不善也偵知應運赴平越襲而
執之厲聲詰曰爾以茅土許安西便當以九五尊我何爲不
舞蹈乎應運曰平東誤矣平東不嘗貢獻天子求冊封乎應
運爲天子命官卽同僚耳何拜爲可望曰吾據滇黔帝制有
餘於冊封何有應運曰如是則平東叛天子卽亂賊矣王臣
豈拜亂賊乎可望怒並執承汾暨姚劉總兵同下貴陽獄可
望猶愛應運才使護衛再三諭降應運語益厲乃與承汾等
同遇害時庚寅九月也定國聞應運死心怨之自是不受可
望節制矣承汾自有傳姚劉總兵四人失其名我

朝賜應運通諡節愍

男承禮編輯

仁和魏錫曾參校
會稽梁繼元覆校

小腆紀傳卷第五十一終

小腆紀傳卷第五十二

前翰林院檢討加詹事府贊善銜六合徐薰譔

列傳第四十五

義士

馬純仁

嚴紹賢

王台輔

石樓寺僧

許德溥

王解卒

祝淵

王毓著

潘集周瑞

周卜年

徐啓睿

沈齊賢

趙景鑾

張槌

鄧思銘

楊應和楊居久

徐英

陳泰

楊履園

李大載吳士楫

畫網巾先生

鄭露

殷國楨

胡澹

劉永錫

魏耕

王寅生

薛大觀

吳炎

潘禮章

馬純仁字朴公六合諸生也乙酉七月聞薙髮令下囊石袖中赴龍津橋下大書橋柱曰與死乃心甯死厥身一時迂事千古完人沈河死屍逆流不腐生平多著作死之前一夕取稿焚之先是有同研究生汪匯者約同赴難而匯竟以順治己丑進士授景陵知縣一日坐堂上見純仁至責以負義驚懼成疾死妻侯氏詳列女傳嚴紹賢無錫諸生聞薙髮令題壁書守義全歸字與妾張氏對經死

王台輔邳州監生崇禎末聞宦官復出鎮將草疏極諫甫入

都都城陷乃還宏光時東平伯劉澤清御史王變張樂大宴於睢甯台輔綾經直入責之曰國破君亡此公等臥薪嘗膽食不下咽時顧置酒大會邪左右欲鞭之變曰此狂生也命引去及南都陷自視其廩曰此吾所樹當盡此粟盡集親朋哭祭就縊石樓寺僧過其門手持一麻鞭指之曰此常事惡用是矜張爲未幾僧自經死

補

許德溥如臯布衣也聞薙髮令下刺字胸前曰不愧本朝又刺臂曰生爲明人死爲明鬼被逮棄市妻當徙解卒王某者高德溥義欲脫其妻而無術終夜歛歔妻怪之語以故妻曰此義舉也得一人代之可矣王曰安得其人哉妻曰吾成子之義代之可乎乃匿德溥妻於母家王夫婦抵徙所如官役

解罪婦然如臯人感其義贖之歸江陰陳鼎爲作王義士傳
或謂德溥死妻朱氏殉之者誤也

祝淵字開美海甯人崇禎癸酉舉於鄉嘗借僧舍讀書三年
僧罕覩其面壬午冬入都會試值劉宗周諍熊姜獄削籍抗
疏申救罰停會試下禮官議時與宗周猶未相識也既得命
始走謁之宗周曰子爲是舉無爲而爲之乎抑動於名心而
爲之也因爽然自失曰先生名滿天下誠恥不得列門牆爾
遂執贄爲弟子明年禮官議逮淵下獄詰指使者姓名慷慨
對曰男兒死則死安肯聽人指使未幾都城陷太常少卿吳
麟徵殉難親爲函殮宿柩下者旬日尋詣南京刑部請竟前
獄尙書諭止之已復草一疏請誅奸輔通政司屏不奏時宗

周再罷官歸因數往從學嘗有過入曲室閉戶長跪竟日不起流涕自搥杭州失守方葬母山中趣速竣工還家設祭卽投纆死年三十有五有月隱先生集

王毓著字元趾會稽人少爲諸生跌宕不羈已受業劉宗周門下同門生成非笑之不顧乙酉六月宗周絕粒未死乃上書曰願先生早自裁毋爲王炎午所弔宗周得書呼其字曰元趾吾講學數十年得子隨之足矣俄其友來視毓著問曰子若何友曰有陶淵明故事在曰是不然吾輩聲色中人久則難持及今早死爲愈乃召故交張樂歡飲旣酣攜燈出門投柳橋下死鄉人私謚曰正義

潘集字子翔山陰人劉宗周弟子聞王毓著死爲文祭之袖

正石及所著詩文至東渡橋下自沈死

周卜年字定夫山陰布衣也聞劉宗周門人王毓著潘集殉義乃痛飲極酣作五噫歌趨至海濱招牧牛兒出一緘付之曰家人來問煩以此示遂蹈海死父追至發緘爲辭親承訣語屬其弟立後事也父號哭曰兒死誠當但屍不可得奈何明日怒濤湧屍而上冠履不脫又有周瑞者亦投江死

徐啓睿字聖思鄞諸生負才任氣嗜擊劍臥起皆佩之醉則拔劍起舞謾罵座上貴人以劍擬之人莫敢忤視相戒遠之然肯規人過至苦口泣下一日忽自埋故劍髡其首事徑山浮屠雪嶠則又澄靜寡言粥粥如真道者甲申之難哭七日夜不絕聲旣而曰江南半壁我高皇帝龍興地建武之業可

望也則又閉關初如踰年南都再陷則破關出掘故所埋劍趨督師錢肅樂營肅樂故與之同社亟引見魯監國問需何官方稱手曰臣請以布衣居肅樂幕入參帷幄出捍軍旅無需官也監國奇之授以錦衣衛指揮不拜自稱白衣參軍時諸營首鼠觀望則詈之曰今日焚舟前進猶或一逞可逍遙坐老以自困乎每江上耀兵先眾立矢石問一日晨起衷甲佩劍集麾下百人徑渡江薄西岸

大兵以爲遊騎不爲意則奮劍直前掩殺過半乃亟出銳師且戒曰觀其帥甚奇必生致之由是長圍四合且戰且擁陷入泥淖中被執諭之降謾罵怒劊其腹實以草懸之望江門其麾下百人亦無一降者方其出也肅樂力止之曰軍行必

無繼徒入虎口奚益曰信陵君欲以賓客赴秦軍豈能若秦
何亦各申其志也吾將觸鬪而死以愧諸營之賦清人者監
國聞而悼之令以原官加贈都督蔭其子爲衛指揮

沈齊賢字寤伊錢唐諸生髫年執經問難師爲之詘性峭直
一語不合輒發聲詈以故人無與近父病刳臂肉療之弗起
屢慟至絕時流寇犯鳳陽寢園江浙騷動治兵者議登陴歎
曰寇未至而勞民奚益流涕上書謂餉不知措兵不知用地
不知屯民不知卹東於具文畫界而保將以聽寇之蹂躪乎
大吏目爲安置弗問乃徬皇痛飲人神廟狂號聲徹衢路行
者皆駭避甲申之難百官率紳士哭臨三日齊賢亦從之而
如其哭廟時羣吏皆駭散因復於里社私立木主每日朝拜

伏地哭題其楹曰臣身誓死君讎必報社故有雷部神堞作
爭鬪狀怒叱之曰汝亦當爲國捍禦徒自金睛赤髮驚里媪
平操杖擊之金泥片片落閭巷小兒環之而譁一市人皆以
爲癡家之人勸以飯進肉怒曰此豈肉食時耶以惡草進亦
澀喉若不可下哭泣不時或阻之答曰君毋阻我我淚盡當
自止或曰頃御史大夫劉公至矣乃具白衣冠往拂地坐扼
腕論事聲淚與俱有一生私謂坐客曰黃巢朱溫儻亦天命
齊賢突起奮拳搏之南都立輒歎曰江左敬仲安在遂遯迹
舉亭山下乙酉闖賊入九宮山爲村農所斃道路傳爲殛於
神越年或告之拊掌起躍曰神能報國讎乎吾少時期爲張
代州今乃不及吳門許秀才吾死矣竟寢疾數日而死

趙景慶鄞縣諸生丙戌六月江上師潰題詩案上曰書生不
律難驅敵何處秦庭可借兵只有東津橋下水西流直接汨
羅清誓死不食旣念貸友人金未償晨起納衣巾於文廟詣
友人家返金友稔其貧訝返之速叩之笑不答走城東躍入
江漁舟驚救之家人亦跡至共以拯溺法活之弟子徐生者
強輿入山不食則謬語之曰李侍郎長祥克紹興矣則又曰
翁洲黃斌卿石浦張名振奉監國恢復矣半年病稍愈聞出
問樵子則曰天下大定何問焉景慶大慟踣地更不復食尋
死

張槌字子隆鄞人世以孝友稱里人呼雍睦堂張氏性喜酒
醉卽陶然臥或彌日不醒國變後改易章服令下乃閉戶取

酒獨酌既醺適牀而走復索酒連舉百餘杯自摩其頂而歎曰彼曲局者惡可以兵之平時方盛暑熱炭牀下覆以重衾俄頃而絕家人舁屍出則已紺色矣丙戌六月事

鄧思銘字建侯南城諸生北都陷說益王由本日王身兼臣子今宗社傾危豈容坐視由本大感動思銘卽號召諸生數百人名曰庠兵以贖財者助餉負才者參謀有勇者出戰請於有司有司笑之曰兵可庠邪眾乃散思銘鬱鬱不得志乙酉建昌知府王域等奉由本舉兵遂入幕參贊城破被執指降將金聲桓大罵乃繫於竿首射之每發一矢輒呼曰未中要害連及六矢大吼曰經時不能殺我技何劣也已而死

楊應和字惠生從弟居久字淡若皆新城諸生邑被圍紳士

議迎款應和賦詩痛哭曰我一身當敵禍不及諸公也眾遂止居久歎曰壯哉吾兄可無與之共事者乎提刀出殺數人並就縛直立不少俯強之不屈旣死屍不仆兩手猶作擊刺狀

徐英字振烈侯官人少豪健擔米爲業而折節讀書喜擊劍談司馬兵法曹學佺嘗訪之鏹戶不見遇諸塗強之至石倉園入社刻其詩於十二代詩選

王師入福州學佺殉難英伏屍哀慟噉舌噴血數升死著有鳴劍集

陳泰字降人鎮海衛諸生隆武元年設儲賢館曾櫻拔爲第一人閩亡流離海上與阮文錫訂交櫻死文錫謀收遺骸泰

哭曰無庸子出而不返則老父倚閭而望吾孤身在死則死耳子効力於親吾効力於師不亦可乎乃匍匐負櫻屍走三十里付其家人殯之歸不食三日卒

楊履圖字萊氏漳浦人按察使聯芳之季子也爲勳臣裔有夙慧讀書日萬言丙戌後隱居不就試悲歌慷慨嘗作書與門客宋琳談興復事琳首之官官責之曰年少酗酒妄談不法邪履圖答曰某故侯子孫念舊德久矣未免有情實不醉得死所幸耳遂伏法時年二十四

李大載字沆若甌甯諸生家貧有志節值宴會敝衣往或請易之曰吾自有文繡在登席酣飲旁若無人乙酉秋往謁孝陵被執慷慨就死

吳士楫字岸濟上杭人氣宇偉然國變後志在請纓闔事敗
慷慨露於語言爲族人某構斃之獄

畫網巾先生者不知何許人服明衣冠從二僕匿迹光澤山
寺中守將吳鎮掩捕之送邵武鎮將池鳳鳴訊之不答鳳鳴
偉其貌爲去其網巾戒軍中謹事之先生旣失網巾盪櫛畢
謂二僕曰衣冠歷代舊制網巾則我太祖高皇帝創爲之卽
死可忘明制乎取筆墨來爲我畫網巾額上畫已乃加冠二
僕亦交相畫也每晨起以爲常軍中譁笑之呼曰畫網巾云
無何張洪曹李四大營潰鳳鳴詭稱先生爲陣俘獻之閩督
楊名高名高謂及今降我猶可免死先生曰吾舊識總兵王
之綱就彼決之可乎之綱見畫網巾歷碌然駭曰吾不識若

也先生曰吾亦不識若也就若死耳窮究之則喟然曰吾忠未報國留姓名則辱國智未保家留姓名則辱家危不卽致身留姓名則辱身若曹呼我爲畫網巾可矣之網抗聲曰吾明朝總兵徒以識時變知天命不失富貴若一匹夫倔強死何益指其髮而詬之曰此種種而不去乃作此鬼怪爲先生顧唾曰吾於網巾不忍去况髮邪之網命先斬其二僕逡巡間羣卒摔之二僕瞋目叱曰吾兩人豈惜死者顧死亦有禮當一辭吾主人而死耳於是向先生拜且辭曰奴得掃除泉下矣欣然受刃之網曰若豈有所負邪義死亦佳何堅自晦也先生曰吾何負負吾君耳一籌莫効束手就擒又以此易節烈名吾笑夫古今之循例赴義者故恥不自述也檢袖中

出詩一卷擲於地復出白金一小封擲向行刑者曰樵川范
生所贈今與汝挺然受刃於秦甯之杉津秦人聚觀之所責
網巾猶班班在額上也軍中有馬耀圖者見而識之曰是爲
馮舜生問其生平則又不能言而福甯州人謂是魯監國大
學士劉中藻之子諸生思沛載之志書焉

鄺露字湛若南海諸生工諸體書學使者試士以恭寬信敏
惠發題露文五比用大小篆八分行艸書於卷學使不之罪
也見海內多事學騎射嘗跨馬出門衝南海令行轡拘之則
吟曰騎驢適值華陰令失馬還同塞上翁令益怒申文學使
者除其名將加以桎梏乃亡命之廣西遍尋鬼門銅柱舊蹟
遊於岑藍胡侯槃五姓土司爲徭女執兵符者雲韞娘書記

歸撰赤雅一編紀其山川風土及女君天姬隊歌舞戰陣之制又蓄二琴一曰南風宋理宗宮中物一曰綠綺臺唐武德年製康陵御前所彈也出入必與二琴俱廣州城陷露抱琴死詩集曰嶠雅手書開雕屈大均謂雖小雅之怨誹離騷之忠愛無以尚之

殷國楨新建諸生薙髮令下以帶繫髮鬢鬢覆腦後走閩中上書隆武帝乞赦書劄印連結四方忠義之士與王得仁部下王禹門契厚說之反正因禹門以說得仁得仁心動而未果也會巡撫章于天巡按董學成屢挫辱諸將又勒賄無厭心戊子正月得仁遂與金聲桓禽于天殺學成以歸明稱隆武四年實未知隆武所在也國楨與禹門等上聲桓平南大

將軍豫國公印得仁建武侯印諸客胡澹陳大生黎士广林亮之徒四出聯絡山寨以應通表粵中永歷帝授國楨職方郎

王師圍南昌走甯州乞師於聲桓副將鄧東陽東陽執以獻王師見固山譚泰不屈死

胡澹南昌諸生胡以甯之從子也以甯爲金聲桓幕客有口辨能斷事聲桓之歸明也以甯實啓之未發而以甯病死王得仁征九江澹詣軍門說曰君侯擁精騎數十萬指揮顧盼反

清爲明冠帶之倫歡呼動地今聞所在結簷刺網以待以下九江奚啻拉朽若乘破竹之勢以

清兵旗號服色順流而下揚言章撫院請救者江南必開門
納君其將吏文武可以立擒遂更旗幟播年號祭告陵寢騰
檄山東中原必聞風響應大河南北西及山陝其誰得而爲
清有也得仁侘其言比至九江一鼓而破戀其擄獲未卽進
聲桓數趣使歸歸以澹謀質聲桓宋奎光曰此上策也從之
未晚黃人龍沮之乃止旣

王師圍南昌糧盡援絕聲桓日責姜曰廣遣使間道出城號
召殷國楨請行澹致書曰廣曰國中擁百萬精兵不能出寸
步而眼穿外援澹非辭難者故敢與相國訣自金氏入城賸
富良鋤貞烈劉天驄家鈔西山解體殺胡奇偉庾嶺以南腐
心郭應銓兄弟不返吉安恨之到今支解曾亨應父子臨汝

莫不敲齒王氏楊萬同時起事者宿怨略徧四維矣且公以附金王者爲義乎不附金王者義乎天下方亂雄鷲並起強者自立弱者因人夫戴舊主稱宗國此固忠義士所願望而亦能者風動之資也今之確乎巋然不與畔援爲伍者獨陳九思孤軍五年百戰卽金王兩家歸正彼卒未嘗通幣聘介尺素於二氏也其受命隆武者揭司馬傅詹事前入國門已厭見其所爲而去自餘不過羣盜假義名以行盜之魁傑蔡全才鄧參三輩前已爲金氏蕩滅餘眾聞北兵至各先散保妻子金之心腹獨張起祥鄧雲龍起祥在瑞州不能有所爲雲龍召烏合崎嶇武甯谿谷間望屋掠烟實羣盜耳以當北兵如振落雖萬眾何益且卽今義士如雲見前者摧折戮辱

如此稍有志識莫不飲恨祝亡今假從年號種怨自恣在前
無真主而欲使氣節之士爲金王出死力其誰聽之相國孤
城瓦注一葉閉目不見泰山豈知重圍之外所在白骨如邱
陵壞南新附郭百里村烟斷滅人之不存兵於何有相國無
庸談義兵矣曰廣得書默然後國楨見執諸客亦次第死澹
謂金王不足惜而徒沮中原之氣發憤噎死

劉永錫字欽爾魏縣人崇禎丙子舉人官長洲教諭邑令李
實知其貧欲以吏事膏潤之謝不應乙酉之變率妻栗氏及
細弱二十餘人隱居吳門我大吏遣人說之永錫袒裼疾視
曰我中原男子年二十渡漳河登大伍躍馬鳴鞘兩河豪傑
誰不知我欲見辱邪取劍欲自剄門下士抱持之乃止裂尺

帛與妻曰彼再至者與若立自決矣旣而女絕粒死妻哭女死大水乏食家僮相繼死乃遣子臨與婦歸魏臨假貸得百金欲馳以獻父遇盜馬驚墮地死初永錫長八九尺容貌甚偉至是毀形骨立見者哀之疾革大呼烈皇帝者三遂卒時甲午秋也同時有齊丈人者葬之閭門外半塘以妻女附之或曰其弟子徐晟陳三島葬之虎邱

魏耕原名璧字楚白號雪竇山人甲申後改名又別名甦慈谿人也少失業學爲衣工於歸安之苕溪然能讀書富翁某奇之贅爲婿因成歸安諸生性豪俠負大志所交皆當世奇士乙酉與於湖州起兵之役事敗亡命走江湖已與苕溪錢續曾閉戶爲詩初學漢魏後學杜甫晚學李白皆登其堂與

長洲陳三島尤心契之東歸遊會稽與張宗觀朱士稚世號
山陰二朗者稱莫逆因以交祁理孫班孫兄弟得盡讀祁氏
淡生堂藏書詩益工然諸子有四方之志皆工詩而非所好
也耕於酒色有奇癖非酒不甘非妓不寢理孫兄弟竭力奉
之每至輒命酒呼妓召宗觀士稚左右之耕嘗遣死士致書
朱成功謂海道甚易南風三日可直抵京口己亥成功如其
言幾克南京已而敗退侍郎張煌言將入焦湖耕復走告曰
焦湖入冬水涸不可駐軍英霍諸營多耕舊識請說之使迎
公計復不就然事頗洩邏者益急纘曾以兼金賄吏得解癸
卯孔孟文者從成功軍中來有所求於纘曾不饜遂以耕蠟
書首之且曰莒上耕婦家梅墅則耕死友所囑聚梅墅者祁

氏所居也時耕適館梅聖遂并郝氏兄弟被執至錢塘耕與
續曾不屈死理孫以計免班孫遣戍尋山陰李達楊遷以爲
耕營葬遣戍而陳三島者以憂憤死

壬寅生六合武生朱成功之攻江甯也其部將阮春雷略江
北寅生從之成功敗入海寅生走鄉莊酣飲怒歌殺妻子短
甲草履持槍馳騎遁不知所終

薛大觀昆明諸生永曆帝之將入緬甸也喟然謂其子之翰
曰生不能背城一戰以君臣同死社稷顧欲走蠻邦圖苟活
不重可羞邪吾不惜七尺軀爲天下明大義汝其勉之之翰
曰大人死忠兒當死孝大觀曰汝有母在其母乃顧謂之翰
妻曰彼父子能死忠孝吾兩人不能死節義邪侍女抱幼子

立於戶外曰主人皆死何以處我大觀曰爾能死甚善五人偕赴城北黑龍潭死次日諸屍相牽浮水上幼子在侍女懷中兩手猶堅抱如故大觀次女已適人避兵山中相去數十里亦同日赴火死

吳炎字赤溟潘檉章字力田吳江諸生有高才國變後年皆二十以上并棄諸生欲成一代史書取實錄爲綱領凡志乘文集墓銘家傳有關史事者以類相從稽核同異爲國史攷異一書未幾而湖州莊氏私史之難作莊名廷鑑目雙盲家鄰故閣輔朱國楨第國楨嘗集國事鈔錄數十帙未成書而卒廷鑑得之謂左邱失明乃著國語招致賓客日夜編輯纂吳潘盛名引以爲重列諸參閱姓名中廷鑑歿其父梓行之

小腆紀傳 卷五十二
莊氏既巨富歸安令吳之榮以賊繫獄遇赦出摘書忌諱語
索詐焉不遂則走京師密奏之莊氏族誅而炎權章同及於
難

男承禮編輯

仁和魏錫曾參校
會稽梁繼元覆校

小腆紀傳卷五十二終